



INATSISARTUT

**Aningaasaqarnermut Nunamullu
Namminermut Naalackersuisoq
/MAANI**

Assilineri: Kukkunersuinermit Ataatsimiititaliaq

Ulloq: 30. juni 2013

J.nr.: 01.31.06/13-00633

**Aningaasaqarnermut Akileraartarnermullu Ataatsimiititaliap pingasunngornermi
ulloq 26. juni 2013-imi aalajangiineranik Naalackersuisunut ilisimatitsineq (suliaq nr.
01.31.06/13-00633)**

2013-imi akuersissutitut atuisut akiliutaannik atorunnaarsitsineq

Naalackersuisut **inassutigaa**;

- kontomi pingaarnermi 50.01.05-imi, Kalaallit Nunaanni Aalisarsinnaanermut Akuersissutitut Nakkutilliisoqarfimmut tunngasumi, aningaasaliisutit 1.950.000 kr.-nik amerlineqassasut
- kontomi pingaarnermi 50.06.50-imi, Aalisarnermut aningaasaliissutitut immikkoortitanut tunngasumi, aningaasaliisutit -1.950.000 kr.-nik ikilineqassasut.

Aningaasaqarnermut Ataatsimiititaliap oqaaseqaatai

1. januar 2013-imit kingumoortumik atuutilersumik sinerissap qanittuani aalisarnermut akuersissutitut atuisut akiliutaasa atorunnaarsinneqarnissaannik qinnuteqaammik Naalackersuisut aammaarlutik nassiussipput. Qinnuteqaammut siusinnerusukkut nassiunneqartumut ataatsimiititaliamillu itigartinneqartumut sanilliulluni qinnuteqaatip matuma allaanerussutigaa aningaasalersuutissatut allat siunnersuutigineqarmata. Kontomi pingaarnermi 51.01.05-imi, Kalaallit Nunaanni Aalisarsinnaanermut Akuersissutitut Nakkutilliisoqarfimmut tunngasumi, isertitakinnerussutit 1,95 mio. kr.-it konto pingarneq 50.06.50, aalisarnermut aningaasaliissutitut immikkoortitanut tunngasoq, aqutugalugu aningaasalersorneqarnissaat Naalackersuisut qinnuteqaatikkut kissaatigaat.

Aningaasaqarnermut Ataatsimiititaliap maluginiarppaa inassuteqaatit aappat kukkusuummat, tassa aningaasat allassimasut siornanni "minus" allassimasariaqanngimmat.

Qinnuteqaammut Naalackersuisunit siusinnerusukkut nassiunneqartumut (suliaq nr. 13-625) ataqatigiissillugu qinnuteqaat una isigineqartariaqarpoq. Konto pingarneq 20.11.50, ingerlatsinermit sillimmatitut tunngasoq, aqutugalugu aningaasalersuinissap tunngaviummik isigalugu ataatsimiititaliamit akuerineqarsinnaannginnera tunngavilersuutigalugu taanna ataatsimiititaliamit itigartinneqarpoq. Aningaasat amerlannginnerat eqqarsaatigalugu aningaasalersuutissat nammineq atugassarisat iluini imaluunniit Naalackersuisoqarfiit allat ataqatigiissaariffigineqarnerisigut

pissarsiarineqarsinnaasariaqarput. Qinnuteqaatikkullumi ugguuna takutinneqarpoq nammineq atugassarisat iluinit aningaasalersuutissat pissarsiarineqarsinnaasut. Kiisalu suliasaq nr. 13-625-mi immikkoortut arlallit nassuiaatigineqarsimangitsut ataatsimiititaliamit aamma tikkuarneqarput. Taakkununga ilaatigut ilaavoq akiliuteqarnissaq pissutigalugu aalisarsinnaanermut akuersissummik pissarsisimannginneq aallaavigalugu isertitassaagaluani annaasaqarsimanermik apeqqut kiisalu aalisarnermut inatsimmi § 14a, imm. 4 naapertorlugu akuersissummut akiliuteqarnissamut piffissaliussamik eqquutsisisimannginneq pissutigalugu ernianik akiliisussanngortitaaneq, nalunaarutip atorunnaarsinneqarneratigut saneqqunneqarsinnaanngitsoq. Kiisalu qinnuteqaatit kingumut atuutilersussat akuersissutiginissaat Aningaasaqarnermut Ataatsimiititaliamit assut tunuarsimaarfigineqarnerat ileqquuvoq. Qinnuteqaammik nutaamik nassiussinissaq Naalakkersuisunit kissaatigineqarpat immikkoortut taakku nassuiaatigineqarnissaat ataatsimiititaliap oqaaseqaatimini naggasiutigaa.

Aningaasalersuinermit tunngasoq eqqaassanngikkaanni apeqqutit ataatsimiititaliap aalajangiinermini 13-625-imi saqqummiussai qinnuteqaammi matumani annertunerusumik isummerfigineqanngillat. Tamanna ataatsimiititaliamit assut naammagineqanngilaq, tassami missingersuusiornermit inatsimmi § 28, imm. 4-mi erseqqilluinnartumik allassimammat paasissutissat attuumassuteqartut tamarmik qinnuteqaammut ilanngunneqassasut. Suliaq 13-625-imut tunngatillugu allakkiamik Naalakkersuisut ulloq 26. juni 2013-imi nassiussippot, tassani ataatsimiititaliap apeqqutaasa ilaat akineqarput. Aalajangiinissami matumani allakkiaq taanna immikkorluinnaq ittumik ataatsimiititaliamit paasissutissanik pissarsiniarfigineqarpoq, naak taanna qinnuteqaammut nutaamut ilaanngikkaluartoq.

Aalisarnek pillugu inatsimmi § 14a, imm. 4 malillugu ulloq akiliiffissaq eqqortinneqanngippat erniat pillugit inatsit naapertorlugu ernialiisoqartarpoq. Tamanna Naalakkersuisunit qanoq isummerfigineqarnermoq pillugu nassuiaat ataatsimiititaliamit qinnutigineqarpoq, tassami akuersissummut akiliutip nalunaarut aqutugalugu atorunnaarsinneqarnissaa kissaatigineqarmat, ernianilli naatsorsuineq aalisarnek pillugu inatsit tunngavigalugu pisarluni. Akiliiffissap qaangiunnerani akuersissutit akilerneqanngitsut erniaannik naatsorsuineq Inatsisartunut qinersinissap nalunaarutigineqarnera pissutigalugu *allaffissornikkut* suliarineqarsimangitsoq qinnuteqaammi matumani Naalakkersuisut allapput. Tamanna assut ajornartorsiutitaqartut ataatsimiititaliamit isigineqarpoq, tassami allaffissornikkut taamatut ingerlaavartumik iliuseqartarneq tassaanngimmat naalakkersuinikkut aalajangiineq, taamaattumillu Inatsisartunut qinersinissamik nalunaaruteqarneq tamatumani apeqqutaanani. Taamaattumik tamanna pillugu Kukkunersuinermit Ataatsimiititaliaq suliamik naliliinissaa siunertaralugu Aningaasaqarnermut Ataatsimiititaliamit ilisimatinneqalersaarpoq. Naak akuersissummut akiliut kingumoorumik atorunnaarsinneqaraluartoq ernialersuinissaq pillugu piumasaqaat Naalakkersuisunit attatiinnarniarneqarnermoq pillugu apeqqut Naalakkersuisut 26. juni allakkaminni tunngaviumik isummerfigaat. Inuit akuersissummut akiliutip 1500,- kr.-ip akilernissaanut piffisarititaasumik eqquutsisisimanngitsut aalisarnek pillugu inatsit naapertorlugu ernianik akiliuteqarnissaat atuutiinnassasoq Naalakkersuisut paasissutissiissutigaat, aamma naak 1500,-nik akiliinissamik pingaarnertut piumasaqaat atorunnaaraluarpalluunniit. Tamanna ataatsimiititaliamit tusaatissatut tiguneqarpoq.

Akuersissummik akiliummik atorunnaarsitsineq, akiliuteqarnissaq pissutigalugu aalisartoq akuersissummik qinnuteqarsimangippat, tamanna isertitassaraluanik annaasaqarnerup

nassatarisaanik, taarsiiffigitinnissamik piumasaqaateqarnermik kinguneqarsinnaanersoq pillugu apeqqut Naalakkersuisut 26. juni allakkaminni akivaat. Taamaattoqarsinnaanera ilisimaneqanngitsoq Naalakkersuisut paasissutissiissutigaa, tassa akuersissummut akiliuteqartitsisoqaleraluartoq aalisarsinnaanermut akuersissutit amerlassusiat aalaakkaasuusimammat. Tamanna ataatsimiititaliamit tusaatissatut tiguneqarpoq.

Aningaasaqarnermut Ataatsimiititaliami amerlanerussuteqartut Siumup Atassutillu ilaasortaataa tamanna tunngavigalugu qinnuteqaatip akuerineqarnissaa kissaatigaat. Tamanna ingerlatsinikkut iluaqutissarsiffiussammat aammalu Naalakkersuisut paasissutissiinerat naapertorlugu tamanna innuttaasunut aningaasaqarnikkut kingunerluuteqassanngimmat. Matumani suliap tunngaviumik pingaaruteqarnera amerlanerussuteqartunit pingaartinneqarpoq, tamatumani pissutsit akuerineqarsinnaanngitsut iluarsineqarmata. Ingerlatsinikkut iluaqutissarsiffiussammat amerlanerussuteqartut isumaqarput qinnuteqaatit siunissamut attuumassutillit kisiisa akuerineqartarnissaannik ataatsimiititaliap pingaarnertut perusia immikkut ittumik saneqqunneqarsinnaasoq.

Aningaasaqarnermut Ataatsimiititaliami ikinnerussuteqartut Inuit Ataqatigiit ima tunngavilersuuteqarlutik qinnuteqaatip itigartinneqarnissaa kissaatigaat: "Akuersissummut 1500,- kr.-inik akiliutip 1. januar 2014-imit atorunnaarsinneqarnissaa akuerisinnaallugu Inuit Ataqatigiit erseqqissumik oqaatigaat. Qinnuteqaalli akuersissummut akiliutip kingumut atuuttumik atorunnarsitsisoq akuerisinnaanngilarput.

Inatsisit ilusilersukkatta siumut isigisumik allanngortinneqarnissamik atorunnaarsinneqarnissamilluunniit tungaannut atuuttuunissaat nunatsinni innuttaasut tatigisinnaasariaqaraat Inuit Ataqatigiit isumaqarput. Naalakkersuisut qinnuteqaataannik akuersinikkut qinnuteqaatinik kingumut atuutilersussanik Aningaasaqarnermut Ataatsimiititaliap akuerinnittannginneranik ukiorpassuarni ileqquusimasoq Aningaasaqarnermut Ataatsimiititaliami amerlanerussuteqartunit saneqqunneqarpoq. Ileqqup tamatuma, innuttaasut suliatsinnut tatiginninnissaannut pilersinneqarsimasup, saneqqunneqarnissaanut suliaq una taama annertutigisumik pingaaruteqanngitsoq Inuit Ataqatigiit isumaqarput.

Siunnersuummut akiliutissat 1,95 mio. kr.-it tamatumunnga taarsiullugu atuarfinnik iluarsaanernut atorneqarnissaat Inuit Ataqatigiinnit orniginartinneqarneruvoq. Tamanna inuiaqatigiit aningaasaataannik pitsaanngitsumik agguataarinerusoq isumaqarpugut. Qineqqusaarnermi neriorsuut eqquutsinniaannarlugu - qinnuteqaat ersernerlullunilu amigaatilik amerlanerussuteqartunit maanna akuerineqarmat assut ajuusaarnartutut isigaarput. Akuersissutinut akiliut siumut atuuttumik Naalakkersuisunit atorunnaarsinneqarsimagaluarpat Aningaasaqarnermut Ataatsimiititaliamit isumaqatigiittumit taparserneqarsimassagaluarpoq.

Suliaq Aningaasaqarnermut Ataatsimiititaliamit suli suliarineqanngitsoq kingumut atuuttumik atorunnaarsitsisoqarnissaa Aalisarnermut, Piniarnermut Nunalerinermullu Naalakkersuisup tamanut neriorsuutigisimammagu ikinnerussuteqartunit kingullertut minnerunngitsumilli assut isornartogartinneqarpoq. Tamanna Aningaasaqarnermut Ataatsimiititaliap suliaannik paasinnissimannnginnermik ataqqinninnginnermillu takutitsineruvoq."

Aningaasaqarnermut Ataatsimiititaliap aalajangiinera

Aningaasaqarnermut Ataatsimiititaliami amerlanerussuteqartut Siumup Atassutillu ilaasortaatitaasa siuliani allassimasutut paasinnillutik Naalakkersuisut inassuteqaataat **akueraat**.

Aningaasaqarnermut Ataatsimiititaliami ikinnerussuteqartut Inuit Ataqtigiit ilaasortaatitaasa siuliani allassimasutut paasinnillutik Naalakkersuisut inassuteqaataat **itigartippaat**.

Ataatsimiititaliaq sinnerlugu

Finn Karlsen
Ataatsimiititaliap siulittaasua